

國

朝

列

卿

紀

國朝列卿紀卷之一百五十九

國子監叙

夫國子監者卽古之大學也自我太祖定都金

府學爲國子學至洪武十五年改建雞鳴山之陽始備六館之制爲監迨我成祖入正大統於永樂元年改北平府學爲北京國子監卽元舊監也於是兩京皆有監矣然監雖設而官未備至永樂六年改司業趙季通爲北京國子司業掌監事至十九年定鼎北京於是本監備設祭酒等官如南監矣洪熙元年上意復都南京仍以北京爲行在至正統六年罷北京行在之號八年又重建規制九年又厯車駕臨幸以及列聖相承莫

不崇重教學簡命師儒所以興崇勸勵之道至詳備矣凡章甫
逢掖之士教於斯學於斯可不思所自效以仰副我 祖宗崇
儒之重典哉今詳各官宦履於後其行實見於事紀其勲德茂
著者表爲列傳

國朝列卿紀卷之一百五十九

國子監總論

蓋聞國家以賢才爲元氣大學者賢才所由以盛衰者也自漢而下歷千餘載官大學者不可勝紀然祭酒如韓昌黎楊龜山許魯齋司業如孔憲公楊諫議吳草廬他官如胡安定孫大山皆不多見豈氣運之使然耶抑成才之難不可若是其幾也我朝崇儒重道建立大學以育天下英才如宋訥胡儼聲著南雍尚矣自肇立北京以來論能振師道者首稱李文毅然文毅嘗言使吾爲順天府尹當綽然有餘獨不能爲祭酒耳頗切疑之及觀李後以祭酒著名如丘文莊之文學林文安之方正謝文肅

之嚴肅石文隱之清介不可概數則文毅之言豈無感慨於中耶肖尚約先生有云一人之身而簿書錢穀有司之事皆備生徒捨筆硯而事趨走甚者亦有所管則挾利害以相要從之則失已不從則失人雖欲矯然自立不可得已卒之學者厚致其意以求逸爲師者亦厚致其愛而樂與之俱逸棄其訓迪之方溺於荒惰之習而於聖賢經傳之學邈然若不聞欲求實才之用不亦難哉嗚呼通於此則可以振師道矣

國朝列卿紀卷之一百五十九

國子監祭酒年表

胡儼

江西南昌人經魁永樂十九

年任洪熙元年致仕見內閣

貝泰

浙江金華人鄉貢宣德二年

任祭酒正統六年坐賊致仕

李時勉

江西安福人進士正統六年任祭酒
十一年致仕卒謚文毅改謚文忠

蕭鎡

江西泰和人進士正統十二年由

侍讀陞任景泰二年入閣詳內閣

劉鉉

直隸長洲人鄉貢景泰三年

由侍讀學士陞任四年丁憂

王恂

湖廣公安人宣德庚戌進士初名

正景泰四年任祭酒尋卒於官

陳詢

直隸華亭人永樂戊戌進士景泰

五年任祭酒天順二年卒於官

劉益

江西吉水人進士天順三

年任祭酒七年卒於官

司馬恂

浙江山陰人解元天順八年以少詹事兼侍講學士掌祭酒事成化二年卒於官

邢讓

山西襄陵人進士成化二年任五年陞禮部右侍郎詳禮部

陳鑑

直隸長洲人正統戊辰進士第二名成化五年任祭酒以人言除名

李紹

江西安福人進士成化六年起禮部侍郎再任未至而卒詳前任禮部

柯潛

福建莆田人狀元歷少詹兼學士居憂成化六年起國子祭酒以終喪辭尋卒

周洪謨

四川長寧人進士成化十一年任十二年陞禮部右侍郎詳禮部尚書

耿裕

河南廬氏人進士成化十二年任十三年陞吏部侍郎累官吏部尚書詳吏部

丘濬

廣東瓊山人進士成化十三年任十六年陞禮部侍郎仍掌監事詳內閣

費閏

直隸丹徒人進士成化二十三年任歷禮部右侍郎詳禮部

鄭紀

福建仙遊人進士弘治三年任本年遷南通政詳南京戶部尚書

林瀚

福建閩縣人進士弘治三年任九年陞
部右侍郎仍掌監事累官南京兵部尚書

謝鐸

浙江太平人進士弘治十一年起禮部右侍郎掌祭酒事十七年致仕卒贈禮部尚書

黃珣

浙江餘姚人進士第二弘治十七年任十八
年陞南京吏部右侍郎詳南京吏部尚書

張潔

廣西平南人進士弘治十八年任正德
元年陞禮部右侍郎詳南京兵部尚書

李旻

浙江錢塘人狀元正德元年以太常寺卿掌
國子祭酒事二年陞南吏右侍郎詳南吏部

周玉

浙江臨海人成化甲辰進士正
德二年陞國子祭酒四年致仕

王鴻儒

河南南陽人進士正德四年由山西提
學副使陞任本年回籍歷南戶部尚書

王雲鳳

山西和順人進士正德四年由山東按察使陞任
五年回籍七年陞僉都巡撫宣府詳宣府巡撫

石珪

直隸藁城人進士正德五年任八年陞
南吏部右侍郎歷內閣少保詳內閣

王瓚

浙江永嘉人進士正德八年任十一年陞
禮部侍郎歷南禮左侍郎詳南京禮部

魯鐸 湖廣景陵人進士正德十一年任十二年養病後起南國子祭酒詳南京國子監

陳霽 直隸吳縣人弘治丙辰進士正德十二年任祭酒十三年致仕

賈詠 河南臨潁人進士正德十三年任本年丁憂歷內閣少保詳內閣

趙永 直隸臨淮人進士正德十四年任嘉靖三年陞南京禮部右侍郎詳南京禮部

嚴嵩 江西分宜人進士嘉靖四年任七年陞禮部右侍郎歷內閣少師詳內閣

陸深 直隸上海人進士嘉靖七年任八年降江西參議歷詹事府詹事詳詹事

魏校 直隸崑山人進士嘉靖八年以太常寺卿掌監事本年致仕

許誥 河南靈寶人進士嘉靖八年以太常寺卿管祭酒十一年陞吏部侍郎歷南戶尚書

林文俊 福建莆田人進士嘉靖十一年任十二年陞南禮侍歷南吏右侍郎詳南京吏部

王激 浙江永嘉人進士嘉靖十三年改國子祭酒十四年養病卒

吳惠

浙江鄞縣人進士嘉靖十四年任太常寺卿掌禮部

呂枬

陝西高陵人進士第一嘉靖十四年任太常寺卿掌禮部

許成名

山東聊城人進士嘉靖十五年任太常寺卿掌國子祭酒事本年丁憂詳禮部

王教

河南祥符人進士第二嘉靖十六年任太常寺卿掌國子祭酒事本年丁憂詳禮部

崔桐

直隸海門人進士第三嘉靖十九年任太常寺卿掌國子祭酒事歷禮部右侍郎詳禮部

張袞

直隸江陰人進士嘉靖二十一年任太常寺卿掌祭酒事二十二年降南太常少卿

徐階

直隸華亭人進士嘉靖二十二年任太常寺卿掌禮部右侍郎歷內閣少傅詳內閣

王用賓

陝西咸寧人進士嘉靖二十四年任太常寺卿掌禮部右侍郎

王道

山東武城人進士嘉靖二十六年任太常寺卿掌國子祭酒事本年遷吏部右侍郎詳吏部

歐陽德

江西泰和人進士嘉靖二十六年任太常寺卿掌國子祭酒事本年陞禮部右侍郎歷尚書

周文燭

浙江山陰人進士嘉靖二十六年陞國子祭酒二十七年養病

李本

浙江餘姚人進士嘉靖二十七年任二十八年入閣

孫陞

浙江餘姚人進士嘉靖二十八年任三十年陞禮部右侍郎歷左侍郎改文部

閔如霖

浙江烏程人進士嘉靖三十年陞太常寺卿掌國子祭酒事三十一年陞禮部右侍郎

吳山

江西高安人進士嘉靖三十一年陞太常寺卿掌國子祭酒事三十二年陞禮部右侍郎

敖銑

江西高安人嘉靖乙未進士三十二年以太常寺卿掌監事本年丁憂

茅瓚

浙江錢塘人嘉靖戊戌進士三十二年以南國子祭酒改任三十二年陞南京吏部右侍郎

李璣

江西豐城人嘉靖乙未進士三十二年任詳南京禮部尚書

尹臺

江西永新人嘉靖乙未進士三十二年任詳南京禮部尚書

郭鑒

山西高平人嘉靖乙未進士三十四年任詳南京工部侍郎

林庭機

福建閩縣人翰林嘉靖乙未進士
三十六年任詳南京禮部尚書

敖銑

詳前嘉靖三十六年再
任三十八年卒於官

沈坤

直隸大河衛人嘉靖辛丑狀元
三十八年起未任被劾下獄

高拱

河南新鄭人嘉靖辛丑進士三十
九年以太常寺卿掌監事詳內閣

秦鳴雷

浙江臨海人嘉靖甲辰狀元四十
一年以太常寺卿掌監事詳詹事府

高儀

浙江錢塘人嘉靖辛丑進士四十
二年以太常寺卿掌監事詳禮部尚書

陳以勤

四川南充人嘉靖辛丑進士四十
三年以太常寺卿掌監事詳內閣

胡正蒙

浙江餘姚人嘉靖丁未會元探花
四十四年以太常寺卿掌監事

汪鏜

浙江鄞縣人嘉靖丁未進士四
十五年任陞南京工部右侍郎

林燦

福建閩縣人庭機子嘉靖丁未進士
四十五年任見南京吏部右侍郎

胡杰

江西豐城人嘉靖丁未進士隆慶元年任本年改用養病

趙貞吉

四川內江人嘉靖乙未進士隆慶元年以掌詹事吏部左侍郎任

呂調陽

廣西臨桂人嘉靖庚戌榜眼隆慶元年任本年陞南京禮部右侍郎

王希烈

江西南昌人嘉靖癸丑進士隆慶元年任

孫鋌

浙江餘姚人嘉靖癸丑進士陞于隆慶三年任陞南禮右侍郎

馬自強

陝西同州人嘉靖癸丑進士隆慶四年任

丁士美

直隸清河人嘉靖己未進士隆慶五年以太常寺卿任六年兼侍讀學士教庶吉士掌翰林院

萬浩

江西進賢人嘉靖癸丑進士隆慶六年以禮部右侍郎掌監事

林士章

福建漳浦人嘉靖己未進士萬曆元年出南改任二年陞禮部右侍郎兼侍讀學士

王錫爵

直隸太倉人嘉靖壬戌榜眼萬曆二年任三年陞少詹事兼侍讀學士掌監事

孫應鰲

貴州清平衛籍直隸如皋人嘉靖癸丑進士萬曆三年以禮部右侍郎掌監事

姚弘謨

浙江秀水人嘉靖癸丑進士萬曆五年改任

呂旻

福建龍溪人嘉靖癸丑進士萬曆五年任

余有丁

浙江鄞縣人嘉靖壬戌進士萬曆六年以太常卿掌監事七年陞禮部右侍郎掌監事

陳思育

湖廣武陵人嘉靖乙丑進士萬曆七年由右贊善陞任八年陞少詹事兼侍讀學士掌翰林院事

許國

直隸欽縣人嘉靖乙丑進士萬曆八年由南祭酒陞太常卿掌監事未任陞詹事兼侍講學士掌府事

周子義

直隸無錫人嘉靖乙丑進士萬曆八年任十年陞禮部右侍郎兼侍讀學士

高啓愚

四川銅梁人嘉靖乙丑進士萬曆十一年由南監改任本年陞禮部右侍郎兼侍讀學士

羅萬化

浙江會稽人隆慶戊辰狀元萬曆十一年任十二年陞南京禮部右侍郎

范應期

浙江烏程人嘉靖乙丑狀元萬曆十二年任二月致仕

張位

江西南建人隆慶戊辰進士萬曆十二年由司經局洗馬任本年陞少詹事兼侍讀學士掌翰林院

徐顯卿

直隸長洲人隆慶戊辰進士萬曆十二年由左諭德兼翰林寺賈任一三年陞少詹事兼侍讀學士

韓世能

直隸長洲人隆慶戊辰進士萬曆十三年由右諭德兼翰林侍讀陞任十四年陞南京禮部右侍郎

李長春

四川富順人隆慶戊辰進士萬曆十四年由左春坊左庶子兼翰林侍讀陞任十五年陞南京工部侍郎

田一儁

福建大田人隆慶戊辰進士萬曆十五年由左諭德兼侍讀陞任十六年陞禮部右侍郎兼侍讀學士

黃鳳翔

福建晉江人隆慶戊辰進士萬曆十六年起國子祭酒十七年陞禮部左侍郎

劉元震

直隸任丘人隆慶辛未進士萬曆十七年由左庶子兼侍讀任十八年陞南京禮部右侍郎

盛訥

陝西潼關衛籍定遠人隆慶辛未進士萬曆十八年由左庶子陞任十九年陞少詹事

國子監祭酒行實

胡敬字若思江西南昌府南昌縣人天資穎悟自幼好學受經於伯父虞部員外郎汝器自求賢士相師友熊伯幾以古文辭自高一見儼亟稱其有所養以古文法授之既長博極羣書至於天文地理律曆醫卜皆通其說洪武丁卯舉於鄉第二人明年會試中副榜授華亭縣教諭時年尚少而能以師道自任勸勉諸生務實學勵行檢以變浮靡之習日親講授每至夜分雖隆寒盛暑不廢父老皆稱重之俄以內艱去丙子改授長垣縣上疏乞近便養親改饒之餘干自是著爲令其在餘干如華亭時士子樂從之成效居多已卯以薦陞安慶桐城令爲政以愛

民爲本凡可便民者以身任之民間積年逋負悉與奏免邑中
虎爲害傷民物乃沐浴於神虎遂滅跡表朱桐鄉墓俾民奉
祀嘗督漕運次三山值大風雪遇中流有覆舟命僕夫援之活
其被溺者三十餘人捕蝗途中見饑餓病者悉命里胥扶掖就
民舍給以藥食是夜大風雨得免暴殄存活數百十八其政行
往往卓異不羣識者知其必爲大用壬午軍旅方殷廣求材以
集事御史府左副都御史練鵬於朝稱儼學足以達天人
之際智足以資帷幄之籌必拔而用之乃知臣言不妄於是
召至京師未及任用而文皇帝已渡江矣翰林缺人吏部以儼
名上上曰儼旣曉天文宜令欽天監驗之且送翰林供

檢討尋陞侍讀命同解縉等七人直內閣備顧問儼在七人中
遇有顧問必從容審度而後對未嘗以才智先人時論多之甲
申陞左春坊左諭德兼官如故侍 仁廟於東宮在講筵凡古
今治亂得失必反復敷陳以圖裨益以外艱去 詔奪情道過
南京入見 東宮詢及民情所對皆切時事其年九月由內閣
出拜國子祭酒以身率諸生奉守學規以圖成效一時人才翕
然從化同朝公卿大夫咸推敬之 文皇帝每加禮重時國子
生有以故告歸者皆坐或遷儼適言其情有可矜者得免永樂
四年丙戌三月 上幸大學御彝倫堂賜坐講經儼講尚書堯
典從容敷暢 上俯聽甚悅賜資優厚儼雖掌國學然 朝廷

有大制作若纂修 高皇帝實錄及永樂大典天下圖誌諸書
皆爲總裁未嘗去館閣儼既善書所進歌頌詩文詞翰並美

上益簡注五年丁亥獻平安南頌七年召赴行在八年二月 上
命以祭酒兼侍講掌翰林院事供史職命戶科都給事中胡濙
署監事十年十五年俱供事行在翰林院復直 內閣輔導

皇太孫監國縝密謹勅上下無間言十九年定鼎北京改北監洪
熙春以疾乞致仕 賜璽書褒美加授太子賓客致仕復其子
孫 賜寶楮爲道里費仍 命有司給舟車還閒居二十餘年
日與學者講求性理之學親藩禮遇之方岳重臣咸待以師禮
與之言未嘗及私自處甚澹薄歲時僅足衣食嘗表許遜韋丹

廟請春秋致祭修白鹿書院且達於報施之理凡處是非利害可否之間必審度以求至當惟恐貽患於人羣儕中有不合卽引退不與辯以故所至能全交旣歸田里雖聲聞不至於朝廷而在朝論舊德耆俊者必歸焉館閣舊遊歲時存問不絕輒相與倡和達官顯人與東南好文之士徵言者足相躡於門正統癸亥八月己酉卒年八十三訃聞詔遣官諭祭命有司營葬德望之隆國恩之厚天下之似者益少其爲文以理爲主不尚辭藻所著有顧菴文集行於世

名臣錄云儼文學優長明於知人嘗典湖廣鄉試取楊溥居首批其所刻文曰初學小子當退避三舍老夫亦讓一頭又曰他

日立玉堦方寸地必能爲董子之正言而不效公孫弘之私曲
後楊溥位內閣少保爲時名臣人服其識

天順日錄云儼爲祭酒以師道自重 文廟亦寵之公卿莫不
加敬士由大學出至顯位者執弟子禮益恭儼遂名重天下先
後居是職者皆莫能及

貝秦字宗魯浙江金華府金華縣人自幼以文行聞永樂乙酉
以大學生中京闈鄉試除教餘干縣學四年遷國子助教十年
陞國子司業宣德二年超拜祭酒時秦以文學受知 宣廟召
見便殿賜御製招隱歌及翎毛二十四幅七年奏言願於南宮
開支俸米分回原籍供祭養親從之十年又奏言近年館

生雖有留者然候撥年遠及至銓除則又齒已衰矣與其待老而放閑孰若簡賢而授職詢知在外儒學多闕教官宜於南北二監選取堪任監生以充其職 上從之於是選舉通經監生四百人送詣行在正統五年六月二十四日 上勅泰等曰夫大學者國家成賢育才之地昔我 祖宗臨御敎之用之咸有定規朕嗣統以來一切庶政咸循舊章諸司亦皆修職爾北京國子監官不務敬慎弛學規玩愒歲月洪武永樂中六堂諸生咸有季試考第高下以伸勸勵今南監尚循舊規北監廢而不舉其間爲師能勤講授爲弟子能勤問學大率計之什不二三此非長敎者之情慢乎尤有甚者莫之顧義惟利是營南北

諸生貧富不齊入監或一月或數月或一年二年卽得撥諸司辦事亦有遂出身者利之能移人也有坐監十餘年貧不得出身使之艱難嗟怨其寧忍乎又與諸司交通凡辦事者一人有關干求撥補東帖動至一二十紙則有勢力者終得之借曰爲勢所逼何爲不執以奏師之所行如此何以表勵學者朕推天地之量姑皆曲宥不問自今宜洗心滌慮改過自新凡洪武永樂監學嘗行之規不許隳廢撥歷事者必依資次不許攬越辦事者亦須公當不許徇私但有私相囑托輒便聽從不奏聞者必罪不恕繼今發明賢聖之道正己以淑生徒毋背義苟利以壞名禍已如復不悛悔將無及故諭六年坐受臧令致仕後縣

尹欲爲造大司成坊木石已具固謝却之尹不得已改爲縣門有文集若干卷

李時勉名懋以字行江西吉安府安福縣人五歲卽知學七歲小學四書皆能成誦甫成童言動以禮旣長大肆力於學夜以達旦隆冬盛暑無間永樂甲申取進士選庶吉士預修太祖實錄守制服闋起復授刑部主事仍與纂修書成轉侍讀三殿災詔求直言時勉條陳十五事一曰停止工作二曰罷四夷朝貢三曰汰冗官四曰賑饑荒五曰慎選舉六曰嚴考覈七曰理刑獄八曰黜臧官九曰散處達官十曰罷遣僧道十一曰省買辦十二曰革接遞軍夫十三曰免生員充軍十四曰設法償

運十五曰優恤軍士 成祖嘉之未幾被讒下獄旣而有之於
卯似楊榮薦復其官洪熙初上疏言事忠謹切直 上怒命武
士以金瓜捶十數下傷肋幾死明日改監察御史又明日下錦
衣衛獄 宣宗卽位謂左右曰李時勉能直言忠臣也 召對
於萬歲山 命誦前所上疏時勉誦至六事少止曰 天威嚴
重不能詳記 上微笑曰正事難信耳問奏稿在否曰已焚之
矣 特命宥之宣德五年修 兩廟實錄成進侍讀學士一日
上幸史館撒金錢於地衆爭取之時勉端立不動 上親取袖中
餘錢賜之又 幸文淵閣命諸學士飲 上曰時勉非朕安能
飲此酒正統三年戊午陞學士掌院 上御經筵命兼經筵官

每當進講必盡誠敬與有所感悟 上亦爲之傾聽聞者莫不稱善以爲范惇夫其人也六年遷國子祭酒旣蒞任崇廉耻抑奔競剔賢否示勸懲士習丕變諸生有疾躬爲醫療至於貧不能娶死不能殯者皆爲營辦恩義兼盡不啻父子初本監自宣德三年以後停止會饌饅頭脣肉逐月照依時估於順天府都稅司門攤課鈔內折支其乾魚椒鹽等料仍辦本色時勉奏准照時估折支鈔母欠其饅頭粉湯豆腐饌米事例給豆麥七年七月又奏歷事監生永樂間惟循入監年月次第撥歷往歲祭酒陳敬宗奏准惟筭在堂年月淺深其言已行矣然兩監仍以監生省祭丁憂在家月日准作坐堂此所以延住至十餘年也

及其起程則捏稱丁祖父母或繼母嫡母憂府州縣保送赴部復監卽將取撥做倣成風不可遽止敗壞彝倫澆漓風俗惑亂人心莫此爲甚似此之徒不忠不孝難以任用雖犯在革前亦宜罷黜請查勘在家丁憂三四次者悉發爲民今後惟以坐堂年月深淺循序撥歷其省親祭祖丁憂俱不准作坐堂月日如此庶以革宿弊息奸詐正人心而學校之政自修矣 上命禮部議以丁憂省祭一二次已復監者照前准作坐堂月日自正統六年十一月初一日赦後復監者宜准所奏俱不准筭併行南監從之八年疏請修大學王振怒坐以擅伐官樹枷號監前監生石大用上章救之獲免九年三月朔日 車駕視學行禮

某禮退御彝倫堂祭酒當以經進講而時勉久病嗽人疑之
是升堂愈敬順色溫氣定賜坐西南隅講尚書闡明帝堯所以
親親仁民協和萬邦之道辭旨清遠聽者忘倦 上爲之喜甚
賜予有加嗣是屢乞休諸生伏闕輒留之歲丁卯懇疏致仕允
之 命給驛舟賜寶鑑爲道里費去之日諸生涕泗送者數千
人觀者如堵旣歸聞 車駕蒙塵號慟上疏言選將練兵數事
卒謚文毅改謚文忠

彭韶贊云嗚呼剛士浩然正氣博文有養學自中秘危言峻行
歷事四帝臣身百折臣心不替學士司成奸姦我忌荷校願代
門徒之義歸老於田名儒風致

野記云奉祭酒先生時勉始爲侍講直諫 仁宗大怒命武士

以十八斤金瓜擊其脇脇折曳出昇下獄楊文貞公遇於外朝

以燒酒灌之得不死 宣宗卽位召見亦盛怒將斃之先生對

云云乃少霽色而釋之及爲大司成在正統中諸生稱之曰父

母之心天地之量時王振勢傾朝野每進香文廟司成設茗延

款至先生獨否振久啣之令人密廉其事無所得彝倫堂前有

大樹是許平仲手植先生嫌其一面陰翳妨諸生班列稍令伐

去旁枝振遂聲罪以爲擅伐官木入私家用傳 聖旨以百斤

枷枷之肆諸成均前時爲三械與司業趙琬掌饌金鑑同枷先

生之械特重數斤而竅極隘不可飲食鑑請易之先生不可始

先生以助教姑蘇李繼爲浮薄厭之至是繼力自效繼家富素
結諸權貴與某伯李者爲兄弟因李托會昌孫公至是李爲求
援於孫孫適生辰家啓宴 太后令行家士禮孫因附奏臣今
歲生辰殊不樂比年每得公卿爲賀國子李先生不過一幅絹
帕然辱此大人君子臨賁爲榮今諸公皆集獨李先生爲 朝
廷械禁臣席無此君子爲重故不樂爾奏上 太后卽邀 上
言之曰祭酒尊貴之臣奈何施以囊頭是甚綱紀 上言不知
太后曰不知作甚皇帝 上遣問之乃知振所爲也卽飛詔放李
先生令就去賀孫舅公乃得釋繼又已備儀物公因就詣其宅
初筵猶未散也或曰諸生司馬恂者上章願代枷伏三日始得

命脫械使姑蘇稍遲卽死矣

又云初李先生在翰林時一歲上元夜 朝廷結鰲山一騎控
先生馬而行中途拾一墮釵以呈先生視之金也懷之歸少酬
騎以錢大書揭於門旣而失釵婦往尋不獲倉卒間人告以李
翰林家有示帖遽往先生叩之婦言夫爲錦衣千戶勾當海外
妾昨出看鰲山失去一金釵尚存其一可驗也先生驗之良是
卽以歸之亦不問其姓氏旣久千戶還妻述失釵事夫言非李
公汝當時憂思爲疾或且致絕汝絕吾亦不聊生是二命所關
也亟往叩謝之因具儀物酬先生先生悉却之其人言公不受
不能強此一片藥乃海域所產初非傷財所得而甚罕貴公幸

受之先生問何物曰血蜴也乃受付夫人言此爲血蜴當識之
旣而先生被擊脇折昇至錦衣適此千戶蒞獄驚曰此李翰林
先生也 聖旨固未嘗令死因密召良醫師入視醫云可爲第
須得真血蜴千戶曰吾曩固嘗貺公立命問其夫人夫人取昇
之醫治藥以板夾脇傳之越一日夜遂甦焉

天順旨錄云祭酒安成李先生初以言事得罪下獄 宣廟登
極後一日御別殿以其激怒 先帝命左右械取將就鞠焉俄
又 命錦衣衛指揮王某出有不測之 命王甫行而先生至
上退近臣某就先生問故先生告以忠誠之實 上出有問某具
以對 上稍怡命仍就獄蓋王某被 旨急趨出時與先生相

失於端門左右而立俟於西長安門外久之而始得之守衛者曰罪人久入矣王某急趨還則先生已得再生矣夫臣子於君父天也天佑善人豈欺我哉

寓圃雜記云正統十一年太師英國公暨侯伯二十餘人早朝畢奏曰臣等皆武夫不諳經典願賜一日假請國子監聽講

上命以三月三日往於是太師率諸侯伯至日到監始携茶湯果餅之類甚豐祭酒李先生時勉命諸生立講五經各一章講罷設酒饌奉款諸侯伯讓曰教授之地皆就列坐惟太師與先生抗禮飲甚歡太師屢辭先生曰秀才家飯不易措置願太師少寬復命諸生歌鹿鳴之詩賓主雍雍抵暮而散此亦太平事也

可齋雜記云正統十年乙丑會試予中副榜不就并下第者
百餘人俱入大學是時古廉李先生時勉爲祭酒趙先生琬爲
司業李先生嚴毅正大極意造就人才初至令坐堂一月後乃
散處於廂房列格致誠正四號號房中有家室者居外早入饌
室讀書俱朔望升堂其於中四號督勵尤切夜讀務盡二更復
令膳夫提鈴循號房門喚起讀書或自潛行以察勤惰無燈者
令人暗記明示責罰自是燈光達旦書聲不歇學者感激競相
勸勉先生多宿廂房每隔三五夜必召予同鄉二三人侍坐談
講先生端坐儼然或說鄉曲舊事或論詩文簡而確婉而有味
聽者忘倦每至更深乃已別時必曰話久誤工夫自當退補且

日三更是陰陽交代時讀書宜更盡卽止不過此時過則次早無精神其愛人多類此

一助教李洪嘗謂予言前歲學內因除庭樹被罰是日先生方坐東堂閱試卷而錦衣官校至卽掩卷起身免冠解帶受縲綬令監諸生來觀者皆驚愕失色獨先生神色自若徐呼諸生近前與語曰某人某處是某處非某人今次稍勝前某人比前不及因顧寮屬曰還須校定高下出榜語畢乃行已 命枷竄監前監生三千餘人上疏奏解有石大用者又獨具本願代枷事乃釋因相與嘆慕其事謂先生平昔涉歷艱險操存有素故禍亂不足以動心如此真有古人氣象而石大用者義氣激發於

輩中亦不可多得然非先生德學感人深何以致此是年夏先生引年致仕及秋以行諸生用旗帳鼓樂羣送出崇文門至城東南乃別有十餘人同予送至通州候先生舟發後歸無不泣下者是舉前此所未有是足以驗先生得人之深也

監志云宣德正統間各衙門寫本監生不拘年月深淺本監揀選撥送戶部等衙門一年爲滿惟兵部三年祭酒卒時勉奏准一年滿者於坐堂六年以上人內選撥三年滿者於坐堂四年人內選撥景泰以來各衙門寫本監生俱以一年爲滿本監照例撥送天順八年通減作八箇月本監挨次選撥

又云本監監生患病舊無醫藥正統間祭酒李時勉移文南京

國子監會勘令本監醫士於順天府醫學取給對證藥餌

詞林記云予觀名臣錄稱時勉至孝父有疾躬視湯藥不離側恤孤救難無間戚疏楊文貞公云時勉文學老成操行修潔節義足以表俗剛正足以任事度量足以容物而志則不可奪真確論也

蕭鎡字孟勤江西吉安府泰和縣人幼失怙恃成童穎悟絕倫登宣德丁丑進士需次於家初宣宗欲選進士之尤者績學以備宮僚既命大學士楊溥掄宣德五年進士得三山薩琦等八人與列作養後又勅通取二年五年八年進士召試於文華殿取二十人鎡爲首通前二十八人如永樂間應二十八宿之

數正統元年授翰林院編修三年預修宣廟實錄成陞侍講
十三年國子祭酒李時勉乞休命鉉代陞國子監祭酒景泰
元年以老疾辭監丞包相合國子生三千人請留如陽城故事
景帝可之仍復舊尋命經筵講官二年景帝幸學命坐講鉉
講書經臯陶篇天聰明一章稱旨尋進戶部右侍郎兼翰林院
學士入閣詳內閣

劉鉉字宗器直隸蘇州府長洲縣人生彌月而孤數歲入鄉塾
輒有志向學雖衣食靡糲弗顧也未冠卽授徒里中從之者甚
衆其言動規模如宿儒鄉之長者皆折輩行與交性孝友母遭
疾刲股肉以進旦夕籲天求代比沒哀毀幾殆見者莫不敬嘆

事兄若嚴師雖加楚箠不怨迎寡弟養於家從父沒而絕嗣以
父命出繼之永樂戊戌以善書徵入翰林明年中京闈鄉試未
上春闈授中書舍人宣德己酉與修兩朝實錄成賜白金文
綺陞兵部車駕主事仍蒞事內廷正統戊午與修宣廟實錄
成進翰林侍講金綺之賚有加戊辰詔擇進士穎敏者爲庶吉
士屬教之鉉懲曩之事虛文者慨然以師道自任俾力追古作
有一字未愜者經月不置以故諸吉士大有所造後多以文學
致名己巳進侍講學士景泰庚午主考京闈及揭曉第一人劉
宣乃盧龍軍士同事者欲更之鉉曰朝廷立賢無方不可乃
止時論黷之鉉未沒宣己第進士爲翰林修撰矣初置經筵

官居首選數賜白金文綺寶鏹遇甚隆辛未夏不雨特遣祭
四瀆壬申春缺祭酒衆難其人大學士高穀曰學行老成無如
劉某者遂抗章薦之命下以鉉國子祭酒士類懽然有得人
之賀鉉曰士子若室女當保愛之於是定程課示教條旦暮講
解如恐弗及有托權貴以求倖得者斥弗聽六館之士帖然時
監生多潛住在京奔競成風鉉奏稱監生有家近在京者當依
親之時雖給文引仍在京潛住一聞行取不待勘到原籍官司
輒詣部告病不曾還攬先復監亟求出身又有聞父母之喪托
故在京守制給由服未滿卽行起復速求利祿有傷風化請禁
止之上命凡監生犯此者到部卽送法司問罪明年養母陳

氏卒 朝廷欲奪其情力求終制服除仍拜祭酒天順改元

英宗復位念官端必求宿德之儒遂陞少詹事餘詳詹事府

監志云舊例監生依親日月俱准坐堂行取文書出部日卽爲
虛曠景泰間劉鉉等奏准文書出部後俱以各布政司遠近爲
限再准水程雲南四川貴州兩廣五箇月福建七十日陝西江
西湖廣兩箇月南直浙江四十日山西山東河南一箇月北直
半月俱爲坐堂月日

王恂字

初名振湖廣荊州府公安縣人宣德五年庚戌舉

進士改庶吉士授翰林院檢討博學工文操行簡約正統中考
滿陞修撰十四年北虜犯順天下洶洶衆議恂有治才推陞左

理寺丞巡撫貴州地方恩威兼濟蠻夷畏服景泰二年陞春坊右庶子兼國子司業四年陞祭酒協劉鉉理監事尋卒於官

監志云舊例清黃清軍寫誥及天財庫寫本監生俱於坐堂四年以上人內撥送三年滿日送吏部聽用其在印綬監續寫軍職貼黃者不准歷事二年出身景泰四年祭酒王恂奏准連坐堂通轉七年出身天順八年以後各項監生通減作一年六箇月送吏部聽用本監隨時於其坐堂年月稍深入內撥用惟寫誥勅者不拘年月深淺

陳詢字汝同直隸松江府華亭縣人永樂戊戌進士選庶吉士授編修宣德間轉修撰正統初充經筵講官三年預修宣廟

實錄進侍讀十三年秩滿陞侍講學士忤中官王振坐累謫知
安陸州已巳召入爲大理右少卿景泰二年陞巡撫大名諸郡
三年改太常少卿兼侍講學士掌院事五年改國子祭酒天順
二年戊寅卒於官

詞林記云予讀國史稱詢剛直慷慨但嗜酒豪放不矜細行及
攷松志乃知其素履考無咎也贊曰條然有鶴唳於華亭刷羽
林臯揚聲海濱彼美人兮抱光含醇秉德惟恒履險不傾

菽園雜記云陳祭酒詢字汝同松江人善飲酒酒酣耳熱胷中
有不平事每對客發之人有過面語之不少貸先生翰林時常
逆權貴出爲某州同知同僚餞之或倡爲酒令各用二字分合

以韻相協以詩書一句終之陳學士循云轟字三箇車余斗字
成斜車車車遠上寒山石經斜高學士穀云品字三箇白水西
字成酒口口口勸君更盡一杯酒陳云轟字三箇直黑出字成
黜直直直焉往而不三黜

劉益字崇益江西吉安府吉水縣人宣德癸丑進士擢兵科給
事中丁憂起復補兵科封駁彈劾務存大體嘗因旱禱雨奉

命祀河洛諸神雨隨注人以爲誠感正統十四年己巳北虜寇邊
上命往山東募民兵以備民賴以安陞湖廣叅議有政績天順三
年召陞國子祭酒在監飭身勵教不至惰窳諸生亦安之六
年下錦衣獄七年卒於官

監志云出巡監生舊例於年深人內挨撥天順六年祭酒劉益奏准於該撥一百名外撥送天順八年又奏准量地遠近於年月相應人內撥送一年滿日送吏部聽用

司馬恂字



浙江紹興府山陰縣人正統甲子京舉解元赴

春官不第入監擢刑科給事中景泰三年與易儲議陞春坊右贊善天順七年超陞詹事府少詹事八年兼國子祭酒掌監事成化元年恂言官吏丁憂俱以二十七月起復並無由服之制考諸經史亦無由服之文今後監生丁憂於正服之外看地理遠近水程革去由服之限俱作虛曠庶幾禮有節文事有定體而奸弊可革矣 上允之三月 憲皇帝幸學賜坐講沐寵賚

但恂爲人通警善處權勢故屢進清秩二年卒於官

邢讓字遜之山西平陽府襄陵縣人正統戊辰進士改庶吉士授翰林檢討考績陞修撰成化二年陞國子祭酒作興學政與司業張業菟故實纂國子監志又刻題名於石屬業記之五年陞禮部右侍郎詳禮部

陳鑑字緝熙世本嘉興商氏元季之亂曾大父賓避地長洲之周莊冒氏陳生方幼稚父潤謫戍益州道京師遺鑑故人范叔璚家稍長去從王大卿一居爲老氏學非其志也然少有高資竊好儒家言能通其說下筆爲文章輒有奇氣他日以事如浙東市書盈篋而歸晝夜誦習卒棄其學而歸於儒以其餘力治

進士業正統九年中順天府鄉試第二人明年禮部中乙榜不就入國子爲李忠文公弟子文名益起忠文奇之十三年中會試十八人廷試擢第一甲第二人授翰林院編修景泰元年代祀北鎮巫閭山還充經筵講官七年遷修撰英宗復位奉使朝鮮天順四年同考試禮部明年預修大明一統志尋選充東宮講官六年主順天鄉試丁母憂服除遷侍讀修英宗實錄成進侍讀學士成化四年主應天府鄉試明年奏詔敎庶吉士五年擢國子祭酒卽讓爲禮部侍郎而以鑑代之爲人莊重簡默於敎條重改更特持成規御人度使可守而已至簿書錢穀之事一付主者務攬大綱不瑣瑣問出入曰吾職不在是也

十一月鑑疏南北兩監官與在京諸司官遷叙事體未始有異如學正等官曹璉等陞僉事邊寧等陞知府景信等陞長史張福等陞知州魏齡等陞監察御史彼時人知激勸近日陞擢惟有學正江深得陞長史耳復是在部考滿人數且各官自任教職以來動經二三十年再爲淹滯不無衰老失年祭酒刑讓雖嘗建言然拘於出身限於考滿兩監各官一人未拔激勸之典似乎未溥也乞訪各官曾經考滿稱職者不分出身不拘年月果有才堪政事量陞長史同知知州以遇激勸如遇三品以上官會保及本部推舉者亦一體陞擢 命下吏部行之故事國子師生月給錢若干爲飲食費然以事去不及給者則貯爲公

錢用之益更數祭酒皆然至邢讓繼之頗以法繩人人始有怨言及既擢爲大學士萬安構害誣其以公錢入已者且及鑑鑑置之殊不以爲意事遂上聞詔大臣雜治邢公對簿力辨鑑歎曰吾官至國子師尊嚴矣安能對刀筆吏掉口舌乎不吐一詞竟服時適萬安從中醞釀之者獄詞上備皆坐除名於是諸生數百人詣闕上章訴誣枉不報旣免官家居遂以七年九月乙酉卒於崇文街里第年五十七爲人容貌岸然望之若不可親及就而聆其言論藹如也人有善喜爲之稱道其不善者亦疾之如仇故卒以此得禍少惟患難家室蕩然能以孱弱自樹立及登第得官而文沒戍所久矣間因東使代祀便道函其父

滑既歸而得旨賜歸葬其父於鄉母子同入里門卒完其家室而加光大之人以爲難事母孝卒居喪三年不肉食不內處不酬應文事時朝廷方修實錄嚴有詔起之上章求終制不允章再上懇求允之平居無聲色之好好止藏書并古書畫器物而已朝鮮嘗因其使以妓女侍不受夷人敬歎至版刻其投贈諸詩行於國中其爲文才贍而氣完所著號方菴集凡若干卷善筆札至臨模古人真蹟殆不可辨

詞林記云予讀碧川論救鑑疏有云文章政事時望所歸自今論之其人品可知雖幼從羽衣長卽儒服變黑崇正亦可尚也李紹字克述江西安福縣人宣德癸丑進士選爲翰林庶吉士

俾積學以俟大用優禮給賜一循永樂甲申之典仍 賜御製

詩以示勉勵乙卯 英宗皇帝嗣位擢翰林檢討預修 官廟

實錄爲檢閱校正正統戊午書成 賜白金文綺加祿秩并賜

宴西苑已未以剋員 賜歸鄉里期年大學士楊士奇卧病

英宗遣內官詢人才舉紹等五人以對 召復任充經筵官丙寅

丁內艱已巳服闋滿九載陞修撰庚午景泰紀元兼 經筵講

官辛未同考會試壬申陞司經局洗馬兼修撰甲戌主考會試

兩持文衡士論翕然推服尋奉命祀南嶽丙子預修寰宇通志

成 賜白金綵幣進右春坊右庶子兼翰林侍講天順丁丑改

尚寶司卿兼侍講尋掌院事冬陞學士 賜二品金織衣戊寅

奉 命與諸學士更番侍講讀於文華殿時禮部郎中李和托
一釋子囑權近求爲禮部右侍郎時論紛紛不平 上密訪學
士李賢尚書王翱俱不許各薦紹喜曰朕知此人久矣次早召
禮部侍郎聞者爲之驚喜及卽任公卿往賀尚書王翱舉酒酬
曰天選侍郎也蓋以前此倖進者多 旨授故云已權貴不平
伺間譖其奉事多南音 上曰大臣以德選何以聲音爲是年
國子祭酒陳詢致仕去吏部舉翰林二人未用乃請命兼領之
上謂王翱曰禮部不可無此人其別選代之甲申 憲宗卽位令
翰林纂修 英廟實錄命爲副總裁越二年成化丙戌書垂成
沾微疾卽上章力求解任 上察其誠許暫歸俟疾愈復求歸

疾愈足跡不履城市或諷之曰疾愈矣何不出耶紹曰吾老矣
出將何爲辛卯春國子祭酒爲其屬所構去天官姚夔議曰國
子監成賢化俗之地官不重不足以隆師道然官之輕重係乎
人今必得學行老成有名望如李某者居之則師道立矣乃援
洪武初起致仕尚書劉崧署司業例起爲祭酒疏上卽日降
勅遣人乘傳起之命未及門而卒見禮部

柯潛字孟時福建興化府莆田縣人景泰辛未狀元及第授翰
林脩撰潛丰神峻整言動謹飭是時翰林諸老多在咸愛重之
用薦入經筵凡朝廷用人有制作加恩典皆與焉壬申四月陞
右春坊右中允兼修撰五月預修歷代君鑑賜白金文綺甲

成二月禮部會試爲同考試官五月 命預修寰宇通志丙子

五月通志成陞司經局洗馬仍兼修撰加賜白金文綺八月考

應天府試舟泊淮揚有舉子鬻私者潛怒命執付有司治以法

天順改元更授尚寶司少卿兼職如故仍許歸省己卯二月命

修 玉牒庚辰春命偕呂學士原主考禮部會試十二月命充

東宮講讀官尋給詔命進階奉直大夫甲申 憲廟嗣位以隨侍

恩陞翰林學士三月有 旨選進士年青質敏者李東陽等十

八人入翰林爲庶吉士命敎以古文詞學八月 上御經筵

初兼經筵官仍賜白金三十兩寶鏤三千貫文綺二表裏九月奉

旨纂修 英宗實錄成化改元八月考順天府鄉試九月 玉牒

成賜鈔千貫是月再奉 旨敕庶子士林瀚等二十四人十二月命掌翰林院印丁亥八月實錄成陞詹事府少詹事兼翰林院學士賜金幣賜宴禮部十月 賜大明一統志戊子二月命日侍經筵講讀七月有詔議 慈懿太后山陵事內閣大臣先進章潛率僚屬繼進論合葬於禮爲宜明日文武羣臣復繼進未得 旨復具疏以死請曰 朝廷大事臣子大節舍是奚所用心頃之俱 召至文華殿諭可其奏衆懽呼而退十二月賜經筵儒臣七人襲衣冠履潛已聞父喪 上命卽其家賜之辛卯四月有詔起復時祭酒缺員難其人 上起用之以厭士論潛聞命具疏乞終制大略言忠與孝豈有二致事君事親初無兩

心使親喪可短則他日所以事君者可知矣 上覽疏許之初
潛素無疾至癸巳八月久居苦塊患左足風痺寒熱繼作自知
不起呼學正弟與之訣瞑目而逝訃聞 上悼惜遣官賜祭復
命工曹營葬詳詹事

周洪謨字堯弼四川長寧縣人正統甲子領四川鄉試第一明
年復占一甲進士第二授翰林院編修景泰壬申陞左春坊贊
善仍兼編修丙子修寰宇志成陞侍講天順戊寅進侍讀署南
京翰林事甲申 憲宗卽位召修 英宗實錄改翰林院侍讀
三年丁亥進侍讀學士洪謨以文爲業然有志政務多所建白
在翰林卽勸 上勤經筵以講 聖學謹內治以敦正本復條

十二事以進及蜀寇作與長寧鄰境稔知其出沒設禦備之術甚悉遂見擒而其地晏然本年歷南京國子監祭酒四年言會饌乃高皇帝成憲宜令議復詔下南京禮工二部計議洪謨又言監生丁憂多有詐冒令原報父存母亡母存父亡并無祖父母俱存者第一次丁憂准坐堂二年第二次丁憂准坐堂三年半若有父母并有祖父母嫡繼母者第三次丁憂准作坐堂一年第四次丁憂准坐堂半年所在官司里老保勘庶使無喪者不詐有喪者不匿矣其在家丁憂者預令申達咨呈以丁憂之日爲始亦不得出一年之外其就教復監監生在部聽考日期以六閏月爲率除考期及往迴水程九閏月准作坐堂餘月

皆不准諸生告畢姻有妻沒於家有司先聞於部以待回娶、
上命禮部議以婚喪服制無遞減之例惟令監生丁憂者欺罔卽
爲虛曠餘如之 上命照近例行自是凡丁憂事故給假者俱
不准坐堂尋令監生患病一年之外不復監者放爲民又令監
生畢姻者如洪謨所言冬十一月又奏言每年差監生六人解
毛襖淹滯虛曠以致年久不得出身乞比照厨料事例免差爲
便從之五年七月又奏請增設東廂房簷下小門一扇以便關
鎖防護書籍從之六年七月又奏言本監紅板倉二十座係
孝慈高皇后積糧以惠養監生妻室乞爲修理庶以表著 高皇
后良法美意於億萬年也 詔從之自後建倉房易蘆蓆覆以

元七年七月改北國子祭酒尋丁憂十一年補原職整飭規矩
表率生徒且言修祀事廣倉儲禁酷刑減正稅攘斥蠻夷六事
上悉嘉納之又奏准申明洪武二十年學規二十八條備榜戒諭
十二年七月奏請加孔子封號改大成至聖爲神聖廣運若謂
孔子陪臣不當稱帝則先儒羅從彥嘗曰唐旣封先聖爲王襲
其舊號可也加之帝號而褒崇之亦可也所封乃當時文王之
王旣正南面之位宜服冕十二旒衣十二章十邊十豆各增爲
十二六佾之舞增爲八佾之舞且古者鳴咏琴瑟堂上之樂笙
鏞祝歌堂下之樂而干羽舞兩階今舞羽居上而樂器居下非
古制也宜令典樂者改正 上命禮官議之於是尚書鄒幹上

言正統十二年三月巡按直隸御史李奎奏請加封孔子 英
宗皇帝制曰孔子萬世帝王所尊已有大成至聖之號 祖宗
以來既仍其舊不必增益今聖神廣運出於伯益贊堯之詞不
若大成至聖本於孟子中庸猶可以擬議也洪武中新創南京
大學止用神主不設塑像故當時祭酒宋訥奉 勅撰文有像
不土繪祀以神主百年夷習乃革之語今北監所有塑像皆因
元舊不忍撤毀耳以 聖朝之制而籩豆佾舞之數則 祖宗
斟酌已有定式矧易謚號加器數舉不足爲孔子重輕所貴乎
孔子之道者在身體力行乃尊崇之實耳所據加封籩豆佾舞
俱當仍舊惟佾舞居下則行太常考正之 上是其言九月壬

子洪謨復奏言孔子之道莫先乎禮樂今欲體孔子之道亦莫先乎禮樂若不能備其禮樂則無以將其誠敬報本之議既疎體道之功安在 上乃降制曰尊崇孔子朝廷盛典邊豆佾舞如洪謨所奏增之本年陞禮部右侍郎詳禮部

耿裕字好問河南盧氏縣人父九疇南京刑部尚書裕出儒官家而資稟特異又清惠公爲一代名臣家庭之間漸染有日當順天府舉鄉試奏乞就試遂中其選景泰甲戌登進士第改翰林庶吉士丙子授戶科給事中尋改工科天順丁丑改翰林檢討當是時將臣有怙寵專恣者清惠劾之忤 旨出爲江西布政使裕亦出判泗州旣而丁憂服滿改定州成化乙酉 召還

復檢討丙戌同考禮部會試預修 英宗實錄遞修撰仍充經筵講官己丑陞國子監司業十二年丙申陞祭酒至國子時臨諸生舉教條嚴而有恩公而有法時勲戚年幼者奉 旨受業裕患其難教取其所當習讀者萃成一書授之他日中使至偶持去 上閱之嘉歎十二年擢吏部右侍郎詳吏部

丘濬字仲深廣東瓊州府瓊山縣人景泰甲戌進士選庶吉士授編修時兩廣用兵經年不決濬條列事宜李文達公一見卽代上之 英宗嘉歎付所司舉行 憲宗登極充經筵講官轉侍講成化三年預修 英宗實錄成進侍講學士續修宋元綱目陞學士濬自出已見撰史略名曰世史正綱有裨世教十三

年陞國子祭酒十六年陞禮部侍郎仍掌監事二十三年奏言
每年監差撥內外衙門辦事歷事該七百六十餘名每清黃刷
卷年分又各加一百名常須一千八百名以上乃充撥用見今
坐班者七百餘人而已凡放回依親者不分科貢納粟通宜行
取復監 上從之又奏言北監南人數少誠爲偏重有失夾持
進學之意欲將本年會試下第舉人到部告入南監及新中舉
人放回依親者照依奏准北監舉人入南監事例照數送入本
監讀書太子少保禮部尚書周洪謨等以聞 上從之濬又奏
言區處納粟監生事宜亦見施行復撰大學衍義補一書以獻
上褒答之尋陞禮部尚書掌詹事府歷內閣少保兼太子太保戶

部尚書武英殿大學士詳內閣

費閭字廷言直隸鎮江府丹徒縣人成化乙丑禮部會試第一
選庶吉士授編修丙申充 經筵官丁酉遷國子司業丁未轉
左諭德仍理司業事弘治元年陞祭酒 孝廟初開經筵充講
官 車駕視學賜坐講彝倫堂閭講商書惟天聰明惟聖時憲
惟臣欽若惟民從義 上諭曰六經載聖人之道講明體行務
臻實效爾師生共勉之并 賜燕賚士林以爲榮閭言行謹飭
準意作人多所造就二年直日講陞少詹事歷詹事陞禮部右
侍郎詳禮部

鄭紀字廷綱福建興化府仙遊縣人天順庚辰進士改庶吉士

授檢討八年乞終養凡二十餘年人嘉其志行成化二十二年起補原職二十三年陞浙江提學副使品藻不淆士心亦服弘治三年陞國子祭酒紀在監未久無所建明第監規甚嚴杜絕干請監有膳餘銀不例取同僚以紀形其短銜之紀以前輩自處遇科道不折節因相與攜撫其事効之 孝廟謂紀到任未

久未宜有此令條折以聞改南京左通政詳南京戶部尚書

林瀚字亨大福建福州府閩縣人成化丙戌進士改庶吉士接丁父母憂八年授翰林院編修十三年陞修撰二十二年陞左春坊左諭德仍兼前職弘治三年太宰王恕薦瀚學行淳正陞國子監祭酒上疏請開科貢以進人才大略謂今天下學校作

養日盛科貢二途取有定數歲有常規不無遺木淹滯之歎禮部議擬 詔令開貢四年令府學一年二貢州學二年三貢縣學一年一貢九年陞禮部右侍郎仍掌監事翰在國學垂十年待諸士嚴而有恩凡差撥歷事定立條規雖勢家子不容請托越次故事祭酒膳役銀歲以百數計悉貯之官購置祭酒公署一所合監師儒公廨悉備實翰創其始也十二年陞吏部右侍郎詳南京兵部尚書、

謝鐸字鳴治號方石浙江台州府太平縣人少穎敏能爲韻語年十四其叔父逸老先生授四子毛詩輒悟大意將冠游邑校與少司空黃孔昭友相與砥礪慨然以古人自期天順己卯發

解第二人甲申登進士第選入翰林爲庶吉士益肆力學問學
士永新劉定之莆田柯潛典故皆深器之成化己酉授編修預
修英廟實錄賜銀幣陞俸從六品癸巳被旨校通鑑綱目
因指歷代得失爲疏數千言以進曰宋神宗好通鑑理宗好綱
目徒知留意其書不能推之政治因論時政之失宜求賢講學
見諸行事不爲二君之徒好甲午命讀秘書條上西北備邊
事宜略曰河曲一方近失聲援夷狄仗爲窟穴夫大河爲關輔
之限而受降東勝又大河之藩籬失此則河不可守況又失河
而退守其何能及况延綏榆林至寧夏二千餘里列堡二十有
三馬步軍二萬三千有奇老羸半之是以往歲寇掠如入無人

之境東自孤山栢林諸堡中自平夷懷遠諸堡西自靖邊清平諸堡又西則寧塞諸處直抵金陽川安邊諸處直抵環慶花馬池諸處直抵固原以至土門塞門山城諸處莫非入寇之處

朝廷久爲搜套之策疑而未決及此無事正宜蓄兵養銳於大周寧夏以爲東西之援漸圖收復漢唐故疆與國初東勝之地據三受降城以極形勢守其不攻者策之上也又曰今用將帥皆晚唐之債帥也戰沒者士卒而名數不聞克捷者士卒而賞歸權勢尅減之暴辦納之艱怨塞胸腹得而使之乎言甚剴切皆鑿鑿可用乙未秩滿陞侍講入預經筵嘗發明誠之者人之道謂務虛名而不實用工夫如漢武帝內多欲而外施仁義唐太

宗外行仁義而內多慚德便是不誠又如梁武帝酷好佛法唐德宗信任盧杞不能明於治道之邪正人材之賢否是不能擇善也唐玄宗初年勵精圖治幾致太平後乃窮奢極欲溺於所愛唐憲宗初年發憤志平僭亂後乃好神仙迎佛骨有始無終是不能固執也時純皇帝頗有偏好鐸以此諷反覆推說皆人所難言庚子丁內艱再羅外艱守禮如古壬寅終制謂人曰初心冀祿爲親今無及矣苟仕非義也遂以疾聞明年癸卯吏部輒起堅以病謝閉門讀書暇則侍逸老登眺方岩鴈宕之上仕進之念泊如也孝皇初度庶政於是廷臣交章論薦會修憲廟實錄詔起入朝供事兵館書汪直王越開邊事長

直庚戌陞南京國子祭酒以廉節爲教士皆刮滌有以請託自愧者又疏上國學事宜曰擇師儒慎科貢正祀典廣載籍復會饌均撥歷其論祀典略曰孔廟從祀之賢萬代瞻仰教化之原龜山楊時程門高弟實行延平之派新經之闡足衛吾道而不預從祀臨川郡吳澄生長於宋而顯於元夫出處聖賢大節夷夏古今大防忘君事虜跡其所爲不及洛邑頑民顧在從祀之列臣固不能無感况二人皆大學之師其於廟祀黜陟不可不正尋以師道難盡疏請致仕不許明年辛亥仲子死先祀無托遂致仕諸生以狀歷部臺請留且疏留於朝鐸抑諸生之納粟馬者至是舉則多所抑者家居幾十載惟讀書求志日不少

懈勢利一毫不嬰於懷而薦者益力戊午會國子缺祭酒特
命陞禮部右侍郎掌祭酒事遣使就其家起之兩具疏辭疾不
允行次越得疾徑歸以狀投紹興府繳進力求致仕不許又疏
求台州府轉奏知府不敢上給事中吳世忠主事潘府言當速
起以盡正人之用使者再至有司勸駕益急遂行至京以求退
而得遷非義所安辭以舊官供職不許始受命其爲教如在京
雍時因地震建言維持風教事內稱人倫風教所先人倫不可
以不明也願正禮典以究明倫之實仕途風教所繫仕途不可
以不清也願重科貢以清入仕之途冗員風教之濫冗員不可
以不革也願革冗員以從京府之制捷徑風教之差捷徑不可

以不塞也願塞捷徑以澄國學之源大略云學校之設所以明
人倫也人倫莫先於父子子雖齊聖不先父食顏曾思三子配
饗堂上而其父列祀廡下有是理哉莫若別於闕里立廟祀叔
梁紇而配以顏路曾皙孔鯉庶幾各全其尊而神靈安妥矣人
倫莫大於君臣吳澄親爲宋之遺臣而醜顏胡元之官祿名節
掃地復何取哉宜斥其用夷變夏之罪罷黜從祀以列於莽大
夫之列臣亦嘗言而未蒙 俞允乞 勅禮部翰林院議處則
禮典正人倫明矣科貢之設皆所以羅天下之賢才而用之也
科舉雖稱得人奈何考試等官皆御史方面之所辟召恩之所
加勢亦隨之於是外簾之官預定去取名爲防閑實則關節乞

令大臣舉部屬等官素有文行者以爲主考庶幾前弊稍革歲貢一途類從姑息凡願授教職者先送翰林院國子監按月考試期年之間擇其果通三場者方許陞考授以職事庶幾教官亦不至甚濫矣京國四方之極天下視以爲準者也順天應天二府大興宛平江寧上元四縣皆爲附郭學校惟二府有之而四縣不設亦以二府學生徒皆四縣之俊秀也不然豈以首善之地而惜此一學校之官哉奈何天下附郭俱各有學其視京府實爲冗濫請從順天應天之制凡附郭縣學止以府學教兼領其事則冗員稍革矣近年以來大開捷徑如納馬納粟之徒卽他日之鬻爵賣官豈盛世所宜有哉今邊事方殷必有以

策獻者往年爲因此輩不諳文理凡撥各衙門者俱各顧人令
遂視爲定例致使六科短差亦以顧人艱難爲辭目前流害其
極如此乞照內府等衙門事例許以年月相應者送寫本亦令
掛選出身庶幾嗟怨少息而風教之地亦稍清矣 上從其議
又疏本監監生號房傾頽不可居住往往寄居雜處軍民之叅出
入不便而僦貸支費亦甚艱難欲望其篤志於學亦難矣乞

勅修理退省堂各東西僕堂量撥居住并議監生病故者雖未爲
官原係 朝廷作養人數比照故官事例給與口糧脚力俱允
行之連疏乞致仕六館師生上章乞留臺臣吳世忠張芝吳舜
力薦不允癸亥 上命輯通鑑綱目并續編爲纂要鐸論黜留

隋胡元之統說皆有據任職三載念祖母趙氏守節未白俟考
滿請以本身 誥命易爲趙氏旌表凡例死者不旌 上特破
格行之仍給 誥命旣而復疏乞致仕疏凡五上辭署印至再
四荷 溫旨勉留不能奪方許養病 命疾愈以聞正德戊辰
吏部上其名權奸用事遂令致仕卒於正德五年年七十有六
贈禮部尚書謚文肅性孤介簡直無華飭節操堅厲慎取予有
防畛晚始寬涵有容居常坦坦雖庸人孺子得親之及遇事則
斷斷一定不可奪志耻溫飽布素蔬食將以終身嘗曰吾無他
長惟安分知止而已故其平生不吝義退不容倖進其進也反
覆辭免至不得已而後就其退也量任揆已奮而決此其出處

大節本末甚明夫豈偶中倖致者國學自會膳不行膳夫之輸
常爲祭酒固有鐸盡籍貯於公不私如南雍構二書樓北雍增
號房置官廨修 文廟前衢奏均屬官與諸生之貧者有餘貯
之而需會膳之復行諸生至館用賄教官謂之班錢爲禁止之
又捐已俸銀以遺教官之廉者平生不喜與內侍往來在纂局
內侍之勢權者每設食恭禮丐一言不可得見義必爲先人有
遺田若干畝斥供先世祠墓祿食稍贏輒買田代之分給諸弟
置家塾資宗族貧葬又買田分諸姪而又創方岳書院築牛橋
閘與調親故婚喪患難之不瞻者鄉郡先哲行義著述靡不蒐
輯表闡或求其祠墓繕祀之老居田里有以自樂每聞朝政改

革君子小人進退消長之機未嘗不感慨深嗟而掩袂也於書無不讀其所爲文甚多尤長於詩蓋其精識絕人論議歸於一是所著有桃溪集續真西山讀書記伊洛遺音伊洛淵源續錄四子擇言元史本末宰輔沿革國朝名臣事略尊鄉錄赤城志及文集詩集論諫錄鋸山集百餘卷

黃珣字廷璽浙江紹興府餘姚縣人聰慧絕人讀書過目輒成誦年二十三歲舉成化辛卯鄉試第一人越辛丑進士試第一甲第二人授翰林院編修二十一年丁外艱服闋當弘治改元與修憲廟實錄二年充經筵官是歲書成陞本院侍讀賜宴及白金文綺四年充經筵講官丙辰分典會試文衡進

春坊右諭德管司業事辛酉陞南京祭酒丁繼母憂 孝宗命
經幄舊臣特遣官爲營葬事及諭祭十七年釋吉復任補國子
祭酒以恩例賜四品 誥命珣掌太學爲之振頽起廢百度具
舉敘養諸生恩義兼至有山西人魏成者貧不能歸止一女已
聘許人欲改聘同舍生以資途費珣廉知卽撥門差以濟之其
餘或病以給藥或死無所歸爲之殯殮者甚夥故一時士翕然
感頌之又斥其公餘銀若干繕理號舍完葺公廨十八年陞南
京吏部右侍郎歷尚書詳南京吏部

張深字仲湜廣西桂林府全州人成化戊戌成進士選庶吉士授
編修弘治己酉轉侍講戊午充 東宮講讀官辛酉主考順天

鄉試十二年進侍講學士十八年陞學士尋遷國子祭酒在監
未久無所設施正德元年陞禮部右侍郎轉左歷南京吏戶禮
兵四部尚書加太子少傅詳南京兵部

李旻字子陽浙江杭州府錢塘縣人少敏悟不羣稍長卽嗜讀
書博問強記日數千言攻舉業文格華暢學者至欲爭識其面
成化庚子浙江鄉試第一甲辰廷對遂魁天下授翰林院修
撰丁未預修憲廟實錄弘治戊申補經筵官已酉丁父憂南
還辛亥以實錄成卽家賜銀十兩絲段二表裏癸丑起復前官
丙辰同考禮部會試滿九載陞左春坊左諭德沈安人卒告歸
居歲餘上疏乞養母戊午直文華殿掌左春坊印兼修

侍東宮講讀辛酉陞南京太常寺少卿壬戌署南京

1

孝廟實錄改太常寺少卿兼翰林院侍讀仍修玉牒充講官賜

白帶丁卯奉命教庶吉士尋陞本寺卿管國子監事纔八月陞

南京吏部右侍郎軀幹秀拔如稠人廣坐談辯懸河出入經傳

馳騁諸子口講手畫或始末不遺亶亶終日聽者忘倦居常志

在康濟謂天下事無難者若太常之辨禮成均之教士皆未久

而他遷詩文有法度著述數種多未脫稿藏於家見南京吏部

周玉字朝振浙江台州府臨海縣人成化甲辰進士改庶吉士

授翰林院編修弘治十四年陞國子司業值祭酒謝鐸力振風

教王以師禮事之及謝致仕掌監事正德二年陞國子祭酒王
無所設施至四年致仕

王鴻儒字懋學河南南陽府南陽縣人成化癸卯發解河南丁
未舉進士授南京戶部主事初領倉庾出納明慎軍民稱便遷
員外郎惟舟淮安督稅鳳陽皆有聲績於是益信爲全才弘治
九年陞僉事及晉副使俱督學山西以德性爲本以文藝爲末
抑浮崇雅先行檢而後詞華品藻高下毫髮不爽又好面誨人
每生徒請益因材開發終日不倦士子翕然歸之 孝宗一日
召兵部尚書劉大夏論時政及當時人才論曰如山西副使王
鴻儒他日可大用大夏對曰斯人才行誠不易得 聖諭是

劉公後以告鄉人胥員外文相曰 朝廷用此等人方擔當得
大事予老不及見予其識之正德四年陞國子監祭酒本年以
方正忤逆瑾回籍後起南戶右侍郎詳南京戶部

王雲鳳字應韶山西遼州和順縣人成化甲辰進士授禮部主
事歷員外郎祠祭郎中弘治丁巳春上疏極詆中貴關左道時
論危之 天子知其名置不問十一月朔 車駕還自泰壇佞
豎奉廣誣以駕後騎馬下獄謫知陝州十四年陞陝西提學副
使設四科以取士曰求道曰讀書曰學文曰治事士皆興起建
書樓於正學書院廣收書籍藏之以資諸生誦書取人首名節
次文詞斥遠貪殘之徒進拔忠正之士禁止僧道師巫之術其

學政嚴厲不少姑息士始不堪而終直其法正德二年陞山東按察使四年召爲國子祭酒尚書張綏以人望起之始被命欲堅辭友有遺書言執政者誦 太祖寰中士夫不爲君用當殺身滅家語於是雲鳳父大司徒佐曰吾老矣汝置我何處死乎不得已泣而就道至無所餽瑾怒欲重以禍不能得而罷時國學教弛以十七約示諸生雖誹謗四出不爲動坐立言動皆不苟廉靜方嚴士類欽式九月上言本監盡行放回依親則該坐堂者舉不過七人貢不過十三人是國學養賢之地科貢一空况近日減歷之恩專及於納銀之人吏部數年以後選用旣無科貢之士必多曳白之徒居官治民年少不經其於治體能然

大損 上從之五年回籍後起都察院右僉都御史巡撫宣府
地方詳宣府巡撫

石珪字邦彥直隸真定府藁城縣人少博雅穎悟明周易與兄
玠齊名先後皆舉鄉魁成化丁未俱登進士第時稱二鳳珪被
選入翰林爲庶吉士除檢討德器剛毅知識不羣館閣稱重之
以纂修功陞修撰侍 經筵講讀賜金帶四品服正德初士風

漸漓於前類多巧宦珪憤世嫉邪作媒說以諷久之陞南京翰
林院侍讀學士已巳遂補南監祭酒教法嚴邃濟之以恕時闕
瑾用事以勵精爲名士大夫當官亦附會振作南京禮部因監
生查對軍冊有患病不容給假珪力主之南京戶科因晒賂黃

冊有不至者輒行典簿廳取供令其每夕畫酉珩以祖宗成憲不敢擅改答之諸生感悅會廷臣議令納銀監生增報年歲或謂將揀選聽點人情恟恟瑤拘集至班惟令遞增一歲繳冊至部亦竟無他人益服其有見五年七月召改國子祭酒以身率人教嚴而諸生莫敢犯時武宗無嗣上疏請於宗藩中擇其親且賢者育於宮中代行溫清蒸嘗之禮八年八月瑤言正統景泰間西北用兵糧儲乏少廩餼不繼暫令減歷今則坐班人寡不敷差撥宜照先年事例照舊歷滿方與起送撥補仍申飭復班限期不使冒送問之法杜絕官醫保結不使長欺偽之風則士有定志人得專業既無欲速之弊亦消見利之心六館

不至於乏材諸司亦足以濟事矣從之九年陞南京吏部右侍郎累官內閣少保詳內閣

王瓚字思獻浙江温州府永嘉縣人弘治丙辰進士第二授翰林院編修十三年丁憂十六年補原職正德二年陞本院侍讀三年陞國子司業五年陞南京國子祭酒六年南京禮部移文本監撰述慶賀 皇上尊慈聖康壽太皇太后慈壽皇太后表文瓚以非奉 旨意不得撰述答之部復查有成化二十三年舊規本監乃與南京翰林院公同撰述八年改國子祭酒爲人坦直未嘗歛怨北監諸生愛戴之十一年陞禮部右侍郎歷南京禮部左侍郎詳南京禮部

魯鐸字振之湖廣沔陽府景陵縣人弱冠遊邑庠提學副使薛綱愛其文由是知名全楚成化丙午領鄉薦高等家在東岡嘗賦詩以見志弘治壬戌舉禮部第一擢進士高第改翰林庶吉士少師李文正公東陽雅重之授編修預修孝宗實錄武宗卽阼詔諭安南鐸充正使賜一品服以行比至宣布威德正其儀禮諸所餽遺悉却之交人稱嘆正德二年遷國子司業十一年陞南京祭酒本年十二月改北京鐸屢歷成均其教主於理道不事章句南北士多所造就尤持清操前宿弊縉紳歆仰之十二年謝病歸至是復得告迺闢園亭時花木屏跡深居爲投老計嘉靖初刑部尚書林俊上疏謂經師易得人師難得

鐸約質渾晦志尚清純道足以鎮雅黜浮學足以訂頑起懦
今釐革庶弊正育賢成德振作士風之時况魯鐸與謝鐸人品
爲類鐸以祭酒養病 孝宗用吏部薦進禮部侍郎掌祭酒事
起之於家遣官以速其行重道尊師頌美有作 陛下今日處
魯鐸如謝鐸則今日之頌美 陛下將亦同 孝宗矣起南監
祭酒二年養病一時撫按之臣暨兩都臺諫交疏論薦先後以
十數皆謂德器溫粹問學淵源植德毅簡宅心廉直莊重渾厚
之文可以華王言醇懿端恪之行可以式鄉俗於是推卿從者
五皆莫之應年六十七卒撫按諸臣以卹典請 詔諭祭一壇
賜謚文恪仍令有司營葬鐸性恬退器量深閎文章節槩見推

天下家居以是漢物嘗作俗言以勸鄉人有巨盜起掠民馬牛
或給爲鐸物心釋之其感化如此所著有蓮北使交東西廂已
有園諸稿若干卷藏於家

陳霽字

直隸蘇州府吳縣人弘治丙辰進士改庶吉士授

翰林院編修正德三年陞侍講九年陞南侍講學士十二年丁
憂復侍講學士陞國子祭酒十三年致仕

賈詠字鳴和河南開封府臨潁縣人弘治丙辰進士正德十三
年由南監祭酒陞任以父年九十有五便道歸省遂留潁本年
丁憂歷內閣少保詳內閣

趙永字爾錫直隸鳳陽府臨淮縣人弘治壬戌進士任右諭議

正德十四年任永表建師模嚴飭士習抑請托進廉節動遵規
範不附權要士風翕然丕變世廟登極命直經筵兼日講

駕幸大學賜坐講大禹謨敷陳剴切進止雍容上屢注目嘉靖三
年陞南京禮部右侍郎詳南京禮部

嚴嵩字惟中江西袁州府分宜縣人弘治乙丑進士正德十六
年任侍講學士署南京翰林院事嘉靖四年任七年陞禮部右
侍郎歷內閣少師詳內閣

陸深字
直隸松江府上海縣人弘治乙丑進士正德十三
年任司業嘉靖七年任八年降江西叅議陞山西提學副使十
一年改浙江十六年陞光祿寺卿改太常寺卿

兼信讀學士兼事府詹事詳詹事

魏校字子才直隸蘇州府崑山縣人弘治乙丑進士正德元年
丙寅授南京刑部雲南司主事遷陝西司員外郎廣東司郎中
每訊重囚齋居默念務期得情凡獄之寃滯人所不能決者卽
片言決之會審監刑衆皆采衣卽事事畢宴飲爲樂公則慘然
澹服是日不飲酒食肉時闈宦劉瑾擅權其黨劉瑯守備南京
倚勢作威臺省官望塵奔謁公獨不往瑯復夷視法司或時判
狀至莫有抗者惟公直行已志京邑有經歷姚元者從子利其
富貴誣以奸狀賄瑯陰爲之地必欲寃死於公訊之竟白
其枉瑯亦莫敢誰何暇則與余公子積夏公敦夫王公純甫

明聖賢之學正德九年 召爲兵部職方司郎中方江彬握重

兵居 大內而寧藩亦有反謀公遂移疾家居正德十六年辛

巳 世廟初服起公首膺廣東提學副使之命力以師道爲已

任崇德行略文詞毀淫祠興社學禁火化厚人倫厥功爲多尋

憂居復補江西兵備改河南督學七年陞太常寺少卿轉大理

寺右少卿八年國子監祭酒缺以提督四夷館太常寺卿掌監

事本年致仕公性孝友每夙興卽省其父母夜則就寢所晤語

無恙乃卽安或疾則累晝夜目不交睫致政時母張老矣日依

依侍食於側年 志聖人真猶饑渴之於飲食其學主於立

本研幾由慎獨 命稽古以協於明誠始博而終約著

有太學指歸六書作祖卒謚恭簡

國琛集載校雅

賢體用之學肆力墳典博求於仰觀俯察

經略民物事鉅細證究且曰寧歛處爲舒復求之靜坐以澄其本於是内外交養之意日持瞿瞿事必先有成法儼然朝夕守而弗渝官歷提學祭酒太常卿澹若寒士

許誥字廷綸河南河南府靈寶縣人弘治己未進士嘉靖六年任侍講學士八年以太常寺卿管國子祭酒事初文華左室列三教之師以誥議撤爨膳釋菜之辰惟輔臣及誥九人相事乃上章講中和上悅曰以已情通天下至治哉又言孔孟全教治情益性靜情動靜無所施功而動可致欲也十年晉吏部右

侍郎十二年歷南京戶部尚書計南京戶部

林文俊字汝英福建興化府莆田縣人正德辛未進士選庶吉
士八年授編修嘉靖四年陞右春坊右贊善九年陞南京國子
監祭酒十一年任十三年陞南禮侍歷南吏右侍郎詳南吏部
王激字泓揚浙江温州府永嘉縣人嘉靖癸未進士授吉水知
縣七年擢吏部文選司主事九年歷稽勲司員外郎改考功十
年進考功司郎中十一年陞南右通政使改謄黃通政十三年
改國子祭酒十四年養病卒

吳惠字正德浙江寧波府鄞縣人正德辛未進士改庶吉士八
年授翰林院檢討十五年陞國子司業嘉靖三年陞南院侍講

八年改翰林院十二年陞侍讀學士十四年陞太常卿掌國子祭酒事本年調南京太常寺卿詳南京太常寺

呂柟字仲木陝西西安府高陵縣人正德戊辰進士第一嘉靖十四年任篤實率人勤於誨迪每有條約動遵古義經書子史博讀詳玩並有發揮門下環向請益耳聽口授無倦不無擇言十五年陞南京禮部右侍郎詳南京禮部

許成名字■山東東昌府聊城縣人正德辛未進士嘉靖十年任翰林侍讀學士十一年丁憂十五年陞太常寺卿掌國子祭酒事本年丁憂歷南京吏部右侍郎禮部左侍郎詳禮部

王教字庸之河南開封府祥符縣人嘉靖癸未進士第二十二

年以左諭德兼侍讀署南院事十六年任十九年陞南京兵部
右侍郎詳南京兵部

崔桐字來鳳直隸揚州府海門縣人正德丁丑進士第三嘉靖
九年任湖廣提學副使十年陞南京太僕寺少卿十五年丁憂
十八年任提督四夷館太常寺少卿十九年陞太常寺卿掌

乙祭酒事二十年陞南禮部右侍郎歷禮部右侍郎詳禮部

張袞字補之直隸常州府江陰縣人正德辛巳進士嘉靖二十
年任侍讀學士二十一年陞太常寺卿掌國子祭酒事二十二
年降南太常寺卿歷南光祿寺卿詳南京光祿寺

徐階字子升松江府華亭縣人嘉靖癸未進士授編修二

十二年任

禮部右侍郎歷內閣少師詳內閣

王用賓字允興陝西西安府咸寧縣人正德辛巳進士嘉靖二十四年任二十五年陞少詹事歷南京吏部尚書

王道字純甫山東東昌府武城縣人正德辛未進士改庶

出改應天府學教授十年陞吏部驗封主事養病嘉靖二十年起

吏部考功八年陞文選員外九年陞稽勳郎中十年改文選

用多協時論大學士方公薦改左諭德十二年陞南監祭酒養

病起國子監二十五年陞南太常卿轉南戶部侍郎二十六年

陞禮部右侍郎掌國子祭酒事本年遷吏部右侍郎卒於任道

性資重厚冲養純粹溫恭淳懿有文學譽未究其用士林惜之

歐陽德字崇一江西吉安府泰和縣人嘉靖癸未進士授六安知州六年陞刑部員外改編修十一年陞南監司業十四年陞尚寶卿十七年陞太僕少卿十九年陞南京鴻臚寺卿丁憂二十五年起原官二十六年陞太常寺卿掌國子祭酒事本年陞禮部右侍郎歷尚書

周文燭字宗明浙江紹興府山陰縣人嘉靖丙戌進士授行人司行人擢監察御史改翰林院修撰二十三年陞右春坊右中允管司業事二十六年陞國子祭酒二十七年養病

李本字汝立浙江紹興府餘姚縣人嘉靖壬辰進士二十七年由南監祭酒改任二十八年入閣

孫陞字志高浙江紹興府餘姚縣人嘉靖乙未進士二十八年任三十年陞禮部右侍郎歷左侍郎改吏部

閔如霖字師望浙江湖州府烏程縣人嘉靖壬辰進士二十八年任侍講學士署院事三十年陞太常寺卿掌國子祭酒事三十一年陞禮部右侍郎

吳山字曰靜江西瑞州府高安縣人嘉靖乙未進士三十年任庶子兼侍讀學士署院事三十一年陞太常寺卿掌國子祭酒事三十二年陞禮部右侍郎

國朝列卿紀卷之一百五十九終